



稿三齋
炳輝子



道光己酉十一月刊
照載書首

序

予於詞有篤好究心者幾二十年頗窺宋人旨趣嘗謂宋以後無詞近乃知五代之妙矣憶童時初授書卽愛學吟詠雖有聲無辭然皆能長短其聲以爲句亦性使之然也甲戌以前不足論自甲戌至壬午爲詞若干首可存者僅十之一二自訂爲一卷題曰秋蓮子詞前稿自壬午以後爲後稿夫予之所處可謂窮矣姑藉是以抒其抑塞無聊而已故自謂秋蓮子詞客言搖落可傷而苦心獨喻焉爾儀徵西御王僧保自敘

秋蓮子詞前稿目錄

瑣窗寒 長亭怨 西江月 念奴嬌 鵲橋仙

鼓笛令 醉花陰 長亭怨 滿庭芳 六么令

江城梅花引 百字令 如此江山

梧桐影 菩薩蠻 壺中天 長亭怨 點絳脣

淒涼犯 如此江山 解連環 深院月

丁香結 揚州慢 南歌子八首

秋蓮子詞後稿目錄

花心動 青玉案 曲游春 洞仙歌 聲聲慢

甘州子五首 長亭怨 疎影 南浦 高陽臺

百字令 水龍吟 陌上花 揚州慢 蝶戀花

一落索 鵲橋仙 雙雙燕 清平樂 訴衷情

齊天樂 浪淘沙 水調歌頭 菩薩蠻

澡蘭香 齊天樂 鋸解令 二郎神 百字令

摸魚兒 澡蘭香 甘州 憶舊游 探春令

賀聖朝 風入松 剔銀燈 一叢花 御街行

金縷曲 金縷曲 春霽 瑤花 長亭怨

留春令 高陽臺四首徵招 玉人歌 齊天樂

晝夜樂 水龍吟 慶清朝 齊天樂

木蘭花慢 揚州慢 鬪百草 探芳信

驀山溪 更漏子 珍珠簾 好事近 明月逐

人來 六州歌頭 夢揚州 月華清

揚州慢 法曲獻仙音 少年游 百字令

二郎神 滿庭霜 芭蕉雨 婆羅門 剔銀燈

春光好 漢宮春 虞美人 醜奴兒 念奴嬌

揚州慢 愁倚欄令 更漏子

侍香金童 水調歌頭 春光好

水調歌頭 眼兒媚 水調歌頭

暗香 眞珠簾 臨江仙 遍地花 摸魚兒

月上海棠 十二時 應天長 花心動

虞美人 水調歌頭

探芳信 菩薩蠻

水調歌頭

瑤花

巫山一段雲

一枝春

御街行

七娘子

阮郎歸

集賢賓

青門引

金縷曲

摸魚兒

金縷曲

青玉案

惜黃花慢

鼓笛令

越江吟

瑣寒窗

玲瓏玉

揚州慢

漢宮春

金菊對芙蓉

西子妝

玉燭新

錦堂春

揚州慢

玲瓏玉

一叢花

詞林叢著總目

嗣刊

卷一

學詞紀要

附

論詞絕句

答書

書後

詞律參論

卷二

上下兩卷

上卷詞律調體考證

附

詞譜附編節要

下卷詞律缺收調體補

附

元人小令附錄

譜

律互證

元以後新製調名略存

卷三

唐五代宋金元詞人姓氏爵里彙錄

詞評所見錄

詞林書目

專集

選集

類書

引據諸書

卷四

上下兩卷

上卷松西書室詞選正編

下卷松西書室詞選副編

秋蓮子詞前稿

儀徵西御王僧保

瑣窗寒

人去香殘寒侵酒淺那能容醉城頭畫角嗚咽幾番吹
起更窗疏風聲動搖是誰做出悲涼意便未成別恨虛
懷驚怯暗凝孤淚 淒最遲無寐待寄語瑤臺凍雲密
閉堪憐瘦影只有梅花相對背燈痕書枕倦歆幾回欲
睡還愁睡料庭前夜半霜飛白糝蒼苔地

長亭怨

秋蝶

秋道子詩前和
漸消瘦不成情緒一點殘魂剩隨香縷艷說花前芳姿
如許已輕誤粉綃慵怯寒淺拍低難舉深際悄悄依依誰
憐見苔陰淒楚如絮散餘霜漠漠飛趁宿痕吹去雙
情自結定羞煞伴春春侶但蒼莽貼地黏天料愁寫滕
王新譜便一霎秋歸好倩梅南春住

西江月

看到秋雲淡薄望來春雨迷離睽停忍淚凝回時一點
心酸到底明月能長圓滿好花信否開遲江頭願網
得西施不道愁生似水

念奴嬌

乙亥七夕

生寒初夜正人間天上舊愁新怨意事而今都不定漫
說橋橫銀漢不渡相思年年今夕只是重提恨怪伊兒
女翦綃吹作花片庭外月淡星沈秋光一度一度淒
涼換點水流螢飛欲墮休訝殷勤紈扇桐葉陰疎豆花
香淺夢裏驚橫亂那堪訴語綵絲曾記相綰

鵲橋仙

題葦灘拳鷺畫

微陰蒼莽十分寒色寒到鷺鷥肩聳夜深風露忒淒清
卻好與蘆花同夢圓沙初起層波閒步浸影練衣欲

凍問伊何處最秋多要隔水芙蓉添種
鼓笛令

暗香淨洗波痕綠早吹透簟涼如玉花底陂分三十六
應艷煞鴛鴦雙宿 綽約淡紅粧束似窺人冰肌新浴
唱到摩訶池上曲且莫問西風遲速

醉花陰

柳絲一桁波搖翠吹皺春痕細簾底悄無人流水門前
有个船兒繫 若教會得相思意飛絮如何起何事最
銷魂十里紅樓酒醒春風裏

長亭怨

丙子春附舟北上小泊桃源晴光繾綣瘦蝶雙飛回
憶去秋九月行吟墟里時風景各殊愁懷增感仍譜
前調寄內沈吟一過當亦淚下霑襟也

卻愁絕春光剛好細織離情柳絲絲渺影逗纖纖拍斜
綃翅怯寒悄水流花謝渾不管行人惱嬌小爲憐伊早
綠遍天涯芳草 凝眺似淒涼舊日况是別懷盈抱雙
雙顧影便消受露涼風峭也不算負了韶華歎人事悲
歡難料待寄語深閨重寫傷心新稿

滿庭芳

野花

新暖初融餘寒猶惻亂紅開遍芳原暗香低貼幽草趁
嬌妍不信春圍錦帳春好處籬落荒寒渾疑似溪頭驀
見名未識嬋娟 東風誰是主含情獨自愁絕無言但
魂消瘦蝶盡日淒然遮莫憑闌寫恨籠紗護一例神仙
闌珊甚離懷正渺凝盼笑春山

六么令

安山道中送春

早春歸去春又何曾至儘教燕愁鶯怨只冷清清地謾
道畱伊惹恨解送渾無計落花流水任憑飄泊好是曹
騰客如醉 飛絮垂楊萬樹偏有撩人意一樣生瘦堪

憐卻怎經憔悴回首江南望遠夢亦無由寄今宵離思
明朝新序猶壓重裘怯寒滯

江城梅花引

迢迢涼夜夜三更最分明不分明倦眼惺忪夢卻幾番
成絮語自疑還自訴心上恨恨難禁一寸心 一寸寸
心儘迴縈月影盈燈影清欲問無問問怎樣分付今生
休更思量生不合多情萬疊重雲憑翦取愁萬疊縱并
刀翦未能

百字令

丙子客都中蓮花寺七月十七夜作

和蓮子言前和
碧空如水早峭寒搖漾愁痕天末梧葉那知秋思苦吹
落西風蕭颯紈扇香銷羅衫翠冷夢繞疎簾月淒涼前
度斷腸豈必離別 今夜試問飛鴻何時南去千里雲
天闊二十五絃聲掩抑屈指流年淒絕玉露華凝銀河
影轉禁漏敲初徹驚心時序近來憔悴休說
如此江山

丙子七夕客中感賦

有情終是天長久年年鵲橋仙渡蟾子絲牽花枝綵散
空外香橫雲路朝朝暮暮算但解貪歡世間兒女珍重
團圓那堪重訴別離苦 銀河光映萬里悵天涯望遠

鄉夢飛度扇影裁冰簾紋挂玉搖曳新涼如縷閒愁替
訴想霧鬢風鬟夜深何處寄語銅龍緩催更漏曙

梧桐影

漏漸遙人初醒涼意半簾吹月斜湘波捲碎梧桐影
菩薩蠻

題綠春女史畫蘭

簾櫳悄悄垂寒影春愁裊裊春光暝何處覓花魂湘煙
綠一痕 銀屏窺曉睡香夢迷空翠天上有神仙風枝
吹鬢鈿
壺中天

寒夜客懷

風搖燈颺正沈沈寂寂一更之後往事無端先夢到總
是不堪回首愁倍情牽歡還恨惹展轉思量夠此心一
寸怎生能个禁受 那更別緒飄零霜侵鬢影拂青衫
依舊想著梅花無計管幾度替他消瘦瑟瑟寒聲依依
孤影一樣關情否最難自信近來疎略杯酒
長亭怨

弔柳

但流水縈迴沙渚一片晴光綠陰何許往事春歸而今
空自怨飛絮翠痕香影都化作煙和雨縱怕惹閒愁怎
不許閒人愁苦 凝佇剩危闌四面零落樓臺無數依
依舊恨算猶有攀條情緒更幾時月冷風清便欲弔淒
涼何處問種樹爲誰應悔多情前度

點絳脣

題畫蘭

雙縮春愁笑紅無語香懷媚花花相對露溼相思淚
芳草多情美人何處湘波翠分明記月涼風細鬢影晶
簾底

淒涼犯

題汪均之宋玉帶樓填詞圖圖爲悼亡姬作

峭風吹冷梨雲夢天涯做盡淒切縱春去渺春歸有日
怨猶能說而今斷絕更何處尋愁悔別只聲聲啼殘血
淚夜雨聽鷓鴣 蛛網空簾挂忍憶當初鏡花輕折依
然倦旅漫相思珮環遙月草綠王孫最悽愴芳心紅疊
算并刀可堪替翦恨鬱結
如此江山

題武彘生萬里浪游圖

半生湖海餘豪氣歸來鬢絲年少拂散鞭塵題殘醉墨
依舊天涯鴻爪荒城古道剩一幅斜陽夢雲南繞回首
蒼涼劍花霜冷自悲嘯 何堪深訴倦旅但衣痕染綠

淒絕芳草唱到關山尊前重聽總是羈懷愁抱年華甚
好算一例飄零慣催人老記取吳淞翦波添畫稿

解連環

拜梅

素心今夕被東風吹折瓣香前席下綠階自埽苔茵想
夢冷空山逸情孤立高處清寒但只有一輪冰魄訝疎
煙弄影綽約扶將翠袖欹側 先開一枝嶺上有芳叢
萬疊低護春色似漢宮飛燕輕盈算僥倖裙邊承恩香
澤斜倚闌干誰喚起枝頭啾噴待吟成翦冰盥手此情
脈脈

深院月

戲詠垂絲海棠

香影外晝長初綽約春痕淡欲無煙重露濃空繾綣可
憐嬌態不勝扶

丁香結

書懷酬內子寄枕

羅掩香沈影斜燈亞聽遍客窗殘雨似倦飛煙絮又逗
著杏裊相思雲縷緘情縫更密關心到夢寒無主温存
今後最是酒醒扶頭慵緒 愁語怎不及鴛鴦幽思停
鍼暗度綠意回環芳紋宛轉忍教沾汗猶自驚怯靜裏

玉觸釵聲誤夜深偎越煖休共輕衾薄訴

揚州慢

暮夏坐洗桐客舍靜懷逸趣不自知其情之何自而
深也以白石自度腔寫之

涼影風絲暗香簾翠那堪此意而今剩閒中倦緒儘冷
醉孤吟更無奈黃昏漸近寂寥庭院遮半桐陰聽鳴蟲
枝上如何先做秋聲 刻花記曲倚闌干敲遍誰磨只
綺扇團團綃衣輕薄消受淒清試與問愁何在愁無際
欲說無憑看冰蟾飛白孤心知爲誰明

南歌子

和道子詩前和
子雅不喜作香奩語新秋客齋無事得閨情八首以
矚光箋書之亦殊有佳致也

葉上秋吹早枝間月漏稀喁喁私語避人時隨手拈將
青子擲相思

浴罷湘簾捲妝成不愛扶一簪涼雪晚涼初自結鴛鴦
絛子繫羅襦

竹外蟾光濕橫陳玉簫涼嚼花低笑唾檀郎倩貼指痕
新樣燕雙雙

蟬影窺奩玉螢光撲扇羅秋河風定淡無波屈指星期
將近暈雙渦

水檻藏花密晶盤汲井鮮瓜心涼沁藕絲牽親手雪來
消渴要儂憐

艷色芳蘭笑脂香絳雪融微風吹酒倦惺忪倚醉曼聲
低唱鬢雲鬆

絡架蟲娘語寒帷蟾子飛畫屏鴛枕月來遲今夜夜涼
涼嫩可相宜

消息疎陰外風流曲檻邊關心三起又三眠捉得王家
團扇恨纏絲

秋蓮子詞前稿終

秋蓮子詞後稿卷一

儀徵西御王僧保

壬午

花心動

子購檀香骨摺疊扇於金陵肆中愛其形製俊妙詞
以賦之

輕襲檀芬相逢處纖纖好春一捻滑笏砑光瑣事金陵
猶記李家遺法碧雲如葉濃香護渾不是團團明月好
珍重春風懷袖幾回開合 比似香桃瘦骨偏掌上奇
擊舊游能說柳拂畫闌側倚斜遮髣髴翠眉嬌貼新詞

莫學黃羅寫怕纖小不禁愁壓更無奈芳塵麴波萬疊
青玉案

仲春二日與吳熙載孫小泉觀梅東園遂放舟平山
堂下小泉出扇索詞爲賦此解書之

入春風雨都成例只盡日簾垂地略減清寒晴有意綠
楊城郭萬梅花裏一棹春波水未教穠艷開桃李料
峭湖山正如此解道斷腸人不易尊前年少醉懷愁思
永叔風流逝

曲游春

春暮與范雨村楊季子游繆園園在海陵城北西去

二里

放眼睛光闊漸路通芳徑園倚溪側花柳宜春便多情
豈在媚人顏色林下清風拂笑攜手塵襟如滌敞雲窗
畫閣憑虛延入四圍空碧此日空傳詞筆只醉墨添
愁衣黶猶昔誰許疎狂有襪褌倦鶴似曾相識何獨春
如客但回首都成陳迹且自攜酒重來良辰可惜

洞仙歌

題湘波秋影圖圖爲歌伎翠玉作

秋橫碧宇渺芳情何似千尺湘波憶湘子自低迷別有
香草天涯誰遣做楓葉蘆花憔悴和煙幽夢墮離合

萍飄略說相思恨提起客裏怕思量臥醒巫雲應灑遍
一江秋淚再寫上西風雁繩斜算真个關心楚天千里
聲聲慢

題友人西冷聽雨圖

響齊煙暗點急風來孤窗有客銷魂一片空明湖山佳
處西冷收拾水光嵐翠做雨聲灑向疎櫺燈影畔早消
殘酒夢潤到詩痕 我亦江湖倦客最難堪蓬底別樣
淒清聽到天涯不分春思秋心匆匆十年別後認畫圖
翦燭重論曾念遠記晶簾不捲漏斷鐘沈

甘州子

效顧太尉負體 秋賦報罷貧病交侵環堵蕭然西
風更緊相對多愁慘之色聞聲半嗟歎之音憂不自
持托之吟咏

相思幾度損纖腰鴛帳煖意遙遙強歡含恨總無聊難
得可憐宵籠翠袖無語只慙嬌

闌干十二月如霜伴倚醉玉肌涼迴身流盼袂輕揚鸚
鵡猝難防低罵著怎地不羞郎

衾池紅擁浪粼粼鉤玉壓篆煙沈睡來輕重不分明釵
股折黃金風露下清淚溼花魂

瓊酥春煖透靈犀花並蒂笑相偎一重羅袜扣參差心

事只心知都不是翻悔太矜持
更無心緒理瑤箏簾悄悄怯空庭除非和夢化飛雲消
不盡深情難訴語拜月夜香焚

癸未

長亭怨

新竹

早新笋園林春去幾日看成綠筠叢聚略出林梢拂雲
先學翠鸞舞月明風靜無一點纖塵汗玉瘦想亭亭渾
不比綠肥遲暮 凝佇記雕香刻粉好是少年情緒娟
娟自倚有誰似者般風度恨無端冷雨酸風驀吹得秋

聲如許算生小孤高直合安排淒楚

疎影

風竹

疎疎密密訝小窗素影無端蕭瑟環珮人歸不管相思
捲起湘波千尺石牀翠拂常如埽想此境都非塵迹更
數聲泉響泠泠入聽定知清極 惆悵花飛木脫暗隨
逝水去光陰輕擲淒不關秋依舊芬芳別有秋心如積
涼生徑曲消殘暑合付與北窗佳客待歲寒雪灑冰敲
到此賞音岑寂

南浦

晴竹

叢碧自檀欒做窗扉一枕夢回人靜將暖媚幽姿澄空
外收拾霧昏煙暝琅玕一一夾池清蔭波紋定不信最
宜風雨夕似此更饒情韻何須柳拂花遮但細細吹
香亭亭顧影贏得好晴光都堪愛春色秋痕無論鸞棲
鳳宿未應閒卻蒼苔徑橫笛孤吹人不見一點月明空
映

高陽臺

雨竹

樹杪陰連苔茵氣潤十分秋意沈沈綠暗迴廊薄寒濕

到重門枝頭莫是相思淚泣瀟湘曾說湘靈任如何霧
重煙濃猶自娉婷可能略遣晴光逗甚年華似水洗
盡淄塵粉滯香沾教人別樣銷魂愁心已共蕉心碎但
聽來不甚分明憶知音寥落天涯詩翠飄零

百字令

張子野之間歌悲緣境起衛洗馬之言愁情以人移
是知哀樂無端而興懷一致也僕命同竹苦心比梅
酸落拓半生蕭條一室淚眼之妻臥牛衣而更病蓬
頭之子坐藜牀而載飢况復風雨連宵鶯花殘夢寫
恨無聊銷魂此際春無光而已去愁有聲而成文吟

咏之事不廢性情之感益深矣

此中何故只慊慊愁悶渾忘時節又恐香塵門外路未必好春三月花事淒然牡丹開後絮捲春如雪十分晴未總教風雨消歇春儘剩得些須賞心何在徒自增憐惜千遍思量無著處不是愁能了結天也無聊將人消遣人卻如何說解衣呼嘯酒懷悲咽如渴

水龍吟

張春巒爲子畫白蓮便面愛而賦之卽以奉贈

湖煙捲綠成雲花光一片清無比鏡影偷窺紅粧羞妬粉容含媚雅致凌波那人如玉盈盈一水想鷗邊夢冷

月明露淨猶依約聞歌意

揮汗涼生羅袂扇清颺暗

香搖曳塵氛自遠相知傾蓋素心如是手弄生綃辭翻

白雪閒中情味正晚風開到門前漫有恨先秋墜

陌上花

包孝廉慎伯見秋佩於都下命玉卿圖其貌寫清蓉

小像作詞紀事徵同輩賦之

匆匆舊夢春風何事又添愁緒柳暝花昏不信韶光如故天涯無奈傷心慣望斷隴頭煙樹怎芳魂巧借彩雲吹現相逢羈旅搵羅衫淚溼香叢佇立惆悵劉郎前度只有閒枝容得意憐心許蘭街十丈淄塵起多半看

花如霧但分明認取傾城顏色任教人妬

附 清蓉赴隴右三載已道光癸未旅都下見嵩祝部名蘭秀者演絮閣一齣雖肌理微燥頰頰微削然已彷彿清蓉在丁丑夏秋間十八九也玉卿照裝寫之而澤其膚豐其頤遂爾逼真感時傷往故為譜湘春夜月賦之望長安眾芳爭繞吟魂一樣看遍春光偏我醉眸昏蔽日柳棉如雪只小枝斜倚著意傷春問有情解否無眠一曲纖步温存一雙蘭櫂同龍泉雨後翠憶經門玉腕招攜何處是一雙蘭櫂同夢巫雲甘州入破怕轉蓬淒斷離根重回首玉簫依約在冰綃半幅畱住香痕

揚州慢

十一月十五與包慎伯徐良卿黃修存吳熙載楊季子包孟開讌集小倦游閣明月照夜光景絕佳各有所賦以紀事予詞先成

煙斂天高霜橫夜迥不知更有仙寰只瓊樓玉宇有如
此清寒想明月當頭自好一年重見何事偏難便陰晴
無憾人生能幾多閒 徘徊素影映池光冰透衣衫任
世笑狂奴天憐倦客都付空談回首四村岑寂輪斜處
夜色將闌念朱門深閉輸他燈燭瓊筵

甲申

蝶戀花

夢冷空屏閒翡翠斜暉雲鬢釵滑金蟬墜蘭燼成灰吹
不起淚珠點滴銅壺水 朱戶沈沈深院閉霜外寒清
桐樹秋心碎無奈鴉啼猶未睡教人略識相思味

一落索

簷馬

風外玉聲輕脆夜涼無睡樹間已自厭秋多更攪得秋
零碎 倦聽不禁搖曳似將愁繫月明花影誤簾櫳猶
彷彿疑環珮

鵲橋仙

閏七夕

玉屏尋睡畫樓凝望秋到銀河較淺曾經離別厭年年
况兩度離愁別怨 疎風夜近輕雲涼宵記得綵花飛
散怎知天上有雙星看桐葉泠泠露點

雙雙燕

昌黎云物不平則鳴然有事處其平苦心獨喻而激
楚乃甚於不平者以予所值不能無言艱瘁紛投則
嗟歎之不足思羽族之含哀愴予懷而多感寓情於
物詞不求工

去來社後算何處為家竟成驕旅輕盈絕俗幾被柳猜
花妬休倚紅樓繡戶只瘦影依依相顧誰同身世飄零
剩有天涯飛絮 纖羽翩翩自許是王謝堂前舊時風
度梁空塵冷不信者般淒楚何况斜風細雨但贏得傷
春情緒無人解聽呢喃枉自淺深分訴

乙酉

清平樂

效孫少監體

無多春意人與花憔悴淚痕偷搵愁無奈瘦損腰纖細
郎心知在誰邊寄書又道相憐多謝書中珍重爲他
努力加餐

訴衷情

效魏太尉體

銅壺響咽夜寒加燈影戰窗紗風惻惻雪如沙凍折瘦
梅花香煖錦屏遮夢誰家自籠翠袖語琵琶怨啼鴉

齊天樂

詠白秋海棠

一庭素蘂秋依約當時有人腸斷月暗牆陰苔侵砌曲
應是不勝清怨盈盈淚點想玉瘦香銷爲誰情緒夢醒
涼宵下階凝佇惜幽艷偏翻幾回顧影卻闌干近處
風露清淺朵訝釵輕枝憐粉膩不似餘花零亂瑤臺妙
選漫燒燭相尋誤回嬌盼寫上冰綃賞心霜外見

浪淘沙

新涼

幾日雨連絲蕭颯無端並無桐葉傍闌干一樣驚秋心

倍怯雪翦衣單 吹夢入雲寰如此森寒冰肌玉骨自
神仙只少龍鬚方錦褥便勝人間

水調歌頭

中秋夜游雨花臺感賦

何事未能釋猛省忽淒然振衣高處長嘯回首萬山寒
皎皎一輪明月不管人間苦樂偏向此宵圓我欲向空
闊呼鶴學神仙 意中事身外物漫相牽脫塵未許閱
歷塵海悟雲煙何處疎鐘清聽又是三更時候有夢定
安閒頓覺衣裳溼風露想娟娟

菩薩蠻

雪意蕭瑟森寒逼人夜來風撼庭戶皆動擁裘寂坐
杯酒加溫意有所感柬古農熙載時冬十一月十九
日

東風著意吹紅豆春來鄭重人消受香篆已成灰珠簾
捲又垂 當心雙玉珮山樣眉難畫金線繡衣裳含情
初晝長

丙戌

澡蘭香

丙戌端午

梅風暖驟樅火晴然節序又逢重午蘭心射粉玉手裁

香枉憶少年情緒剩而今事事傷心吟入湘絃倍苦綠
滿菖蒲幾日花開煙渚 舊俗何妨爾爾綵蒜當楣朱
符懸戶聊傾濁酒更倚方牀黍夢光陰虛度笑閨中翦
舌調禽多事教他學語卻正好綺扇相攜商量新暑
齊天樂

丙戌七夕和丙子都中七夕韻

乍疑秋向星期好今宵是何情緒驟雨狂飄沈雲低壓
閉了紅樓朱戶盈盈隔語怕波溢銀河玉輪重阻接羽
成橋笑他烏鵲太勞苦 更深天氣忽霽卻娟娟淨月
良夜如許好夢難憑佳期又準應向遙空分付繁愁似

縷甚瓜果筵前巧思乞與絡緯西風往懷休更訴

鋸解令

院鶯啼盡斷腸聲更簇簇蜂繁蝶碎日來沒處著思量
看葉上露珠欲墜 个人孰是咫尺銀屏萬里燒香欲
自遣憂情翦不斷篆煙又起

丁亥

二郎神

春雁

春將恨與驀地雁聲驚顧自兩兩連行並翼何似相呼
暮雨寄盡相思啼欲斷誰信比吟商更苦空憑夢到衡

陽此意擾飛絮 知否天涯草綠易迷歸路怎一任東
風勸說因甚飄零且住弔影傷心關塞隔况社燕別般
情緒且休為煙景低回忘記葦灘霜露

己丑

百字令

題殷古農小照

平生幽賞算惟有白石清泉間意更聽松風吹謾謾吹
落濤聲天際瀟灑胸襟超然塵表心任閒雲繫岑苔堪
證畫盟何日重記 予亦結習溪山攜琴倚劔別具狂
奴態安得買山金十笏箕踞看他人世憔悴青衫飄零

詩卷只有君知己懷君如月共君千日沈醉

摸魚兒

泰和己丑元遺山赴并州道逢捕雁者捕得二雁一
死一脫網去其脫網者空中盤旋哀鳴亦投地死遺
山以金贖得二雁瘞汾水傍壘石為識號曰雁邱賦
摸魚兒弔之事載詞苑叢談吾友寶應劉楚楨言其
鄉柘溝有雁冢事絕相類舉事徵詩適在道光己丑
歲次之符亦一奇也

更何心尙能無死此情哀動靈羽關河飄泊相依久飛
宿自今誰侶悲欲訴安得有少年拔劔捐羅去驚魂誓

許只紫塞風淒夜臺月冷或是再逢路 蒼涼處滿目
荒煙草樹愁聞嘹唳鴻語相思漫說鴛鴦塚癡絕善懷
兒女情獨苦待寫向秋空寥泐層雲暮君來弔古算多
少人間悲歡離合寂寞委黃土

庚寅 辛卯

澡蘭香

庚寅端午

榴英亂落燕壘孤棲觸目便縈幽恨蒲難九節艾誤三
年漫說五絲續命記年時調笑閨中戲插釵符兩鬢剩
有傷心忍對翠匳塵影 正是黃梅雨候浙瀝空庭者

般淒冷羅衣未換紈扇如秋怎不添人愁損算光陰炊
黍匆匆何似先教夢醒只未盡一縷吟情偏多哀哽

甘州

予僦居方氏之樓有燕巢焉鷓鴣天巢空燕遂不復來
哀而咏之

對空簾寂寞玉鉤斜情緒爲憐伊幾商量庭戶營巢纔
定香夢低迷不覺春光苒苒春已綠成圍無限恩勤意
總付歔歔 一樣擊珠心事看差池掠羽未忍重歸料
紅樓翠戶何處好雙棲儘遭逢死生離別算者般身世
大悲悽最愁說杏梁塵冷落盡香泥

憶舊游

題汪冬巢寒林獨步圖

正頽雲戀晚積靄凝陰一片荒寒意興悲何限任孤筇
瘦倚極目長天故人一時零落塵夢太無端憶醉臥黃
壚相看渺若回首當年 求仙又何事有萬古塵埃百
歲松栢欲灑西風淚便西風吹淚不到重泉爲拂巖前
片石惟是代吟牋我亦共君恨茫茫對此魂黯然

探春令

風雪杜門寂然清况詠吟所至寄興無端

亂翦冰紋紛迷絮影凍結滿天雲氣漫遣鴻尋何須鶴

訝共說天公玉戲看粉碎虛空卻做得晶瑩如此應知
有客高眠蓬門竟日深閉 寂寞紙窗清味問開否梅
花十分寒矣棹返溪頭詩吟驢背別是一般情思未待
今宵去早攬入許多春意春至如賓爲春拚取沈醉
賀聖朝

燈迷寶樹香成陣心情無定伴推曲誤未能知煖鬆雙
鬢 柳條春漏梅枝寒恐怕簾中人問二分明月一分
雪意一分雲影

風入松

春雨

峭寒時候最無聊
簾幙暗生潮
重雲低壓愁千疊
漫愁
懷擬逐雲飄
纔覺一些春至
便教芳意都消
紅樓相
隔望迢迢
空自水沈燒
梁間未有雙棲燕
卻倩誰絮語
閒宵剩得淒涼殘夢
檐聲竟夕瀟瀟

剔銀燈

春雪

虛白光搖窗紙更點點
吹來簾底風力餘寒裁冰鏤玉
莫是剪刀初試無聲委地
便花也不成情思
寂寞年
光如駛又早聽征鴻歸矣
望極天涯迷濛飛絮誤卻離
愁夢裏重尋何似看溶漾
一溪流水

一叢花

春冰

不曾吹皺綠粼粼
風色有餘寒
朝來淺約波痕
住訝
開玉鏡光圓
莫待花飛纔看
春泮旭日易晴暄
鳴榔
溪女袖雙揜
玩弄倚嬋娟
可知桃浪深千尺
漫凌波步
學纖纖雁杳魚沈
相看愁絕薄倖又誰邊

御街行

春泥

新茵綠襯芳郊
遍路接池波
遠柳橋殘雪未全融
幾日
晴光催暖
雕鞍繡轂冶游過
處蹂躪春風軟
分明鴻

迹愁難遣何似冰消散可憐塵影是花魂狼藉殘紅誰
管勞他燕子殷勤銜去做弄空梁怨

金縷曲

春陰

未識春何緒卻似人懷憂抱恨一般淒楚鎮日峭寒吹
益力吹得層陰墨聚渾不是淡雲微雨晴意鳴鳩呼不
轉儘杜鵑啼血深深訴簾幙外冑煙霧東君特爲花
調護算虧他模糊耐到紅開香吐杳渺天涯芳樹暗不
見歸鴻過處侍商酌閒愁幾許午睡乍醒還中酒更愁
來歷亂風前絮春已半再休誤

金縷曲

去冬十二月二十六日與趙蓮澈僧雨田踏雪至平
山堂之西麓蓮澈爲題名於山神廟壁以記今春同
輩偕游復過其地見壁間題字猶存低回久之不能
無感嗟乎至樂之境人生不恆有有之又往往不能
自得蓋憂患相乘而身心未易一日閒也率成此解
書於舊題之左人事多乖興懷殊致且未知後之視
今又何如也

風景殊今昔記衝寒狂游到此雪花如擘萬徑蒼茫人
蹤滅松竹滿空蕭瑟有誰向雲邊橫笛渴飲漫辭村醪

濁更豪情姓氏畱鴻迹苔蘚上墨痕溼 須知百歲如
駒隙笑重來光陰已換我猶閒客天氣漸晴寒食過兩
月風狂雨急便好也無多春色回首醉翁呼不起只堂
前楊柳依依碧杼蓄念淚沾臆

春霽

倚聲酬汪冬巢見寄

春意如秋想綠樹雙屏一般岑寂漸覺風輕乍看煙斂
商量幾分晴色悶懷略釋小窗閒試春風筆在歎息同
是美人遲暮歲華惜 羅幕半捲柳絮香飄石闌斜遮
桐影翠拂算多時窺園得未那堪芳事已狼藉擬醉酒

樓吹鐵笛怕笛聲咽吹起一片愁雲感懷同調淚痕沾
臆

瑤華

賦梨花

鉛華欲謝庭院春閒剩數枝幽潔欺晴做冷還認是昨
夜東風吹雪香痕何處但看取一叢新葉更未須搖落
成秋誤了迷紅胡蝶 誰憐夢影徘徊待化作行雲愁
又如纈桃花開候應自悔當日玉容輕別燈兒纔炙想
深閉重門淒絕卻共誰淺證相思只有滿階明月
長亭怨

送春

算芳事消沈煙雨鎮日簾垂峭寒庭戶共說春歸可知
春至在何處倦懷如觸偏此際驚時序別恨自年年問
畢竟爲誰凝佇 遲暮覓殘紅不見只有滿空飛絮都
來寸念怎容得曹騰分付憶夢中略訴懽情怕新夢全
非舊緒待送盡東風添倍相思淒楚

留春令

詠胡蝶花

花開鹿韭春將謝傍砌石數叢低亞分明枝上蝶衣輕
莫蝶是花魂化 淡粉新脂勻染乍尋香伴誤他飛下

一般愁影逐東風又卻被游絲惹

高陽臺

苔痕

香拾殘英幽尋細草庭陰溼翠沈沈和煙和雨分明綠
上階層芳情不共春榮悴任霜華雪片侵凌自依依孤
緒誰邊寂寞遙岑 當時屐齒經行處記于今未埽門
掩幽深密竹低垂無端渾卻陰晴園林往事休重憶步
荒谿舊徑沈吟便看來者樣淒涼不到飄零

高陽臺

草色

迢遞離蹤淒迷恨影陌塵何處西東乍有還無依稀望
極遙空浮沈花氣渾難辨襲餘香別樣葱龍算多番微
雨芳滋暖日晴烘少年俊賞笙歌地認裊腰一道惆
悵游悰夢繞巫雲情辭漫遣波通春風染得相思遍儘
相思搖蕩春風莫登樓樓外天涯水複山重

高陽臺

花陰

石徑斜鋪苔輒曲磴濛濛花氣如絲醞釀春工幾番露
浥煙滋媽紅一片春何在識殘紅已是春歸只分將葉
底枝頭似隔天涯一庭清影閒無奈認芳姿是否應

訝來遲倚遍闌干濃愁暗積誰知黃昏悄立羅襦薄怕
月明誤卻佳期更愁他鶯語模糊蝶夢迷離

高陽臺

絮影

撲處疑無看來乍有滿天恨緒紛吹者樣迷濛攪春盡
了誰知春魂搖曳渾如夢算而今夢也依稀只沈沈四
面窗遮一桁簾垂飛紅過處殘香在逐殘香飄散在
冑空枝渺寞天涯賺他燕子雙飛何如竟自沾泥去怎
影兒畱伴斜暉最憐伊未了萍因又與波隨

徵招

去秋張篠谷王鶴汀先後自鄱陽歸二君皆酷嗜吟詠每邀同人爲詩詞之會已而篠谷病廢而鶴汀猶時一爲之子自四月病至冬十月倩人而興不能出門戶聞諸君亦落漠寡歡無復吟詠寒月滿窗漏聲催夢低回人事愴惻予懷率成此解寄示諸君

沈沈夜籟寒尤靜霜天但聞雁唳風景乍初冬竟蕭條如此沈疴今未起歎寥落酒場詩事抵得天涯雨荒苔冷相思情味 枕上漏聲遲清光迴半窗皎月如水忽憶早梅花定橫枝煙際小亭虛夢倚想紅萼也羞憔悴未愁損一縷吟魂向夜深搖曳

玉人歌

十一月八日見月作

暝煙外正暮色初收清光如水照一庭岑寂窗冷怯孤倚傷心破鏡悲鸞影離恨憑誰寄更何堪翠袖單寒鬢絲憔悴 塵宇淨如洗漸玉兔輝盈似人歡會月缺時多休道圓時易一年况說當頭好商酌陰晴際怕同雲忽地吹來雪意

齊天樂

寒雁

陣寒早向秋空斷譙譙更深驚遽回首沙洲荒蘆折葦

和汪冬巢
都是舊曾棲處天涯歲暮只四野蒼茫雪霜風雨瑟縮
含哀料應聲咽不成語 早知無異鄉土甚南來地暖
空滯羈旅病翮堪憐孤形自弔身世憑誰分付低回恨
緒怕略識東風又迷歸路鳥盡千山此時情最苦

壬辰

晝夜樂

燒燈節後清明近數芳期無憑準者番雨橫風狂不似
暖輕寒嫩寂寞樓頭春色冷又何况主人煩悶燕子信
無歸卻依依相並 淚痕拭面羞鸞鏡忍重勻殘粧粉
天涯誰寄相思祇自織腰瘦損憶昔琵琶能寫恨更無

奈愁人倦聽夜夜夢魂迷繞屏山無定

水龍吟

和汪冬巢

可憐情緒慊慊愁深未易珠簾捲那知天氣而今已是
春光過半曉屋猶霜夜窗少月十分寒戀漫箏移雁柱
琴調鳳軫待分付閒懷遣 回首西風憔悴比秋來一
般多感曹騰薄醉飄零殘夢未堪繾綣燕子知何處憶
芳信相思天遠只雲堆雨積沈陰不放晴光見

慶清朝

題汪冬巢歲寒觴咏圖

華燭燒銀金尊泛綠一時綺宴爭豪鸞牋待擘不教寒
點霜毫合遣小紅低唱新聲吹度紫雲簫瓊帷護翠爐
香煖春在今宵 聞說小園雪霽早梅開素靨柳試織
腰寒消易得芳情無奈難消已是夜殘漏滴強人扶醉
擁貂袍還應念歲華易晚雙鬢蕭蕭

齊天樂

燈花

銀缸夜夜佳期卜相思暗拋紅豆夢墮煙痕心灰蘭燼
耐得春宵倜傥釵痕玉溜想四照雙然此情非舊珠蕊
低垂隔簾寒影漸吹透 紗籠儘須遮護悵東風未識

花事虛負淚滴銅盤光分鐵鈇算是開殘時候枝單葉
偶怎宜喜宜嗔任人尋究彈指春空問芳情似否

木蘭花慢

游絲寄汪冬巢

看茫茫塵海春不定任伊吹算夢醒花前魂消雨後無
限尋思漫同柳花蕩漾做滿天愁恨影迷離自是千絲
意縷都來一縷心絲 風痕近處簾垂將暖意趁晴時
怕催去斜陽暝煙漠漠夕霧霏霏空畱可憐誰與儘纏
絲原不礙春歸和著殘絨香唾憑教繡出芳菲

揚州慢

豆花

瓜蔓牽餘稻花香裏秋風開遍疎籬看長藤引碧卻側
 綴繁枝便孤蝶幽尋有意荒塍斷隴殘夢都迷只蛩吟
 淒切訴愁不到芳時 風懷舊恨甚傷心依約蛾眉扁
一名蛾眉豆花况珠絡飄零翠翹寂寞難解相思枉憶春紅南
 國而今剩露冷霜淒悵心期前度涼陰斜月參差
 鬪百草

秋海棠

寂寞涼宵是誰灑遍相思淚花比人嬌人如花瘦依約
 翠簾近底淡無言且莫怨開遲新粧自倚卻露寫脂容

煙含粉態者般幽致 休憶紅酣春夜芳訊消殘空剩
 可憐今日意夢遠韶華豔空凡俗又何必雕闌玉砌紅
 顏好不信秋風感憔悴渺情思掩重門一痕月霽

秋蓮子詞後稿卷一終

秋蓮子詞後稿卷二

儀徵西御王僧保

癸巳

探芳信

崔五小川以汪冬巢所作桂花便面屬題冬巢歸道
山已一年展玩之餘不能無悽惻焉爰譜此闕應之
詠物乎懷人乎不自知其意之所至云爾

意重省想玉案春消晶簾夢醒甚一片秋心都寫作花
影相思寂寞瓊枝折望極雲天迴是誰教月露畱香者
番淒冷 何處寄清興便闋苑琳宮未堪孤詠金粟成

秘道子詩後集 卷二
一
塵休說生高嶺寒犀不貯香盈斛只貯千般恨更何堪
綠暗煙蕪舊徑

驀山溪

題聽鷓畫冊

紅疎翠密漸覺春光去是處畫樓閒僅鶯聲啼殘芳樹
曉來夢醒綺思太無聊晴絮外陌塵消卻卻春風度
員吭低轉似倩新簧語歌吹艷揚州怕聽到箏琶都誤
煩襟如滌坐久竟相知鵲夜泣燕西飛莫共閒愁緒

更漏子

桐葉蕭疎簾半捲虛廊一帶秋多滿天風露冷銀河遲

月未舒波

簪素玉扇輕羅翠痕暗蹙修蛾徘徊清影

奈愁何水沈燒未過

珍珠簾

新秋過棣華齋談星北以畫索題淡月疎桐湘簾半
卷一美人隱几而臥意蓋爲海棠寫魂也因賦此解
應之抽妙緒於虛無挹靈芬於縹緲恨不起冬翁與
共商之耳

玉階約略尋秋遍影冥濛無奈今宵秋淺花睡未曾醒
散一庭幽怨夢裏乍驚風片冷渾不似梨雲低冑情眷
想環珮珊珊歸來誰見 應恨去絕芳踪甚嬌容鬢

釵枝斜顫淚點記相思只露痕猶泣欲傍闌干低喚著
又恐被柔情淒斷難遣禁幾度銷凝空餘繾綣
好事近

題汪冬巢畫櫻桃白芍藥

清艷謝穠華露漉一枝明潔卻憶紅珠帳暖又將離時
節 記曾相見玉窗前夢尾春消歇寂寂蒼苔花落待
箇儂來說

明月逐人來

效黃仲則體

鑪薰煙裊簾紋涼引庭陰外晚風吹暝相思天上屈指

星期近今夕初三記省 月上冰絃纔有一絲絲影那
堪被牆兒遮定素娥何事這恁心情忍偏說團圓易等
六州歌頭

七月十七日作

憂懷歷亂此際倍淒然狂雨沛涼風捲做秋寒太無端
身世憑誰問感哀樂悲聚散成追憶空惆悵只心酸路
改黃昏騁望知何極眇眇愁牽歎蕭條今後錦瑟促離
絃憔悴華年鬢霜添 算功名事繁華境都休矣復何
言愛吟詠耽杯酒亦雲煙念艱難今竟雖無也漫作賦
莫憑闌捐余袂遺余襍若爲憐欲采芙蓉贈遠洞庭外

波浪兼天向小窗孤守竟夕意連絲盼切晴邊
夢揚州

題程雪門虛過庵填詞圖

者年時向吟牋無限低回並不是愁意興而今都非匆
匆鏡裏春華歇又雨風催送秋歸心中事從何說儘教
雙鬢成絲 如此淒涼爲誰曾瑟怨人長笛聽鄰吹倦
緒自尋幾度香添燈移翠簫一樣調新韻只淺深商酌
悲哀還寄語來鴻去燕提著相思

甲午

月華清

春游感興

零落紅樓淒涼翠館說甚繁華歌吹倦眼逢人也自粉
融脂膩但相看臉際眉邊總覺有許多愁思憔悴更何
堪修竹暮寒孤倚 感舊傷今何事怎淺惜輕憐酒都
成淚羅幕燈搖別樣魂迷心醉待和伊雙宿雙棲還只
恐香銷鴛被尋味算夢境分明夢醒誰記

揚州慢

題張石樵寄巢夜話圖

人事飄塵年華逝水不堪溯說當時歎天涯缺冷又鄰
笛孤吹更十載匆匆畫裏山河邈若宿草霜淒算而今

回首空餘無限哀思 夜寒竹屋有羈愁名士曾棲念
促膝燈窗論文尊酒珍重心期恨與重泉相及尋常恨
雨別風離只人間陳迹依稀鴻爪春泥

法曲獻仙音

題王二波僧寮譜曲圖

芳恨飄煙倦懷沾絮別樣春游情思寶馬嘶風油幢障
日晴臯麴塵吹起認宛轉紅橋畔垂楊寺門閉 笑驃
騎又何嘗欲圖作 平佛 阮思曠戲何驃騎卿
勇邁終古乃圖作佛 傳彩筆綺
語懺除猶未鏤玉壘新聲付鸞簫親為重倚往事難論
况春光明日休矣只厭厭夜飲不管剩花婪尾

少年游

征鴻過盡恨誰傳心緒只慊慊修竹窗櫺曉風暮雨翠
袖不勝寒 可知春事成蕭瑟秋信更無端那為悲秋
何堪消瘦自昔誤嬋娟

乙未

百字令

題程又橋江樓坐雨圖

長江千里有人在縹緲孤樓為客終日只堪蒙被臥一
似蓬窗朝夕急雨奔騰狂風瀕洞莽莽天如墨披圖試
問也應驚動心魄 何如擊節高吟闌干拍遍豪氣能

翔逸唯願乘長風破浪安用無端憂抑山勢南來濤聲
東去今古斯陳迹遙情猶繫未教消盡殘滴

二郎神

題宋秋南先生畫蟬

枯形自閱儘有露痕風屑又說甚塵中蛻羽身世飄然
剩劫綠樹春歸鶯燕去憑占取一枝高潔情誰寄碧無
聊抱恨未須說 幽咽園林溽暑已多淒切况幾日涼
飈木杪斂卻薰風炎熱一片冰心寒若此爲甚事不能
知雪縱無奈鬢影霜催休共候蟲聲歇

滿庭霜

題梅蘊生嵇庵圖 嵇庵繪圖之意蘊生自序之矣
而屬予題詞予無以易其意也第述其意則猶之蘊
生之意而加不逮焉然蘊生屬予題圖非必欲言其
意也此直題圖而已其有當於蘊生之意否乎則不
敢知耳

竹木傷心煙雲過眼未堪重憶當時吾廬何處身世儘
流離不信人葉俱在銷沈盡鴻爪春泥空畱取畫圖省
識窗戶記依稀 明知皆幻影頻年學佛貪愛如遺怎
桑林三宿猶自情依夢逐雲飛月繞荒涼甚舊徑都迷
知惟有孤桐易感悲切共心期

丙申

芭蕉雨

秋窗

霧閣雲窗何處算秋光
剩得風和雨試倩綠紗低護爭
奈只隔離情難遮恨緒
幾曾親見玉女空自憶眉嫵
還傍著畫櫺從頭數數不盡意
淒涼說甚珠箔飄春華
燈照暮

戊戌

婆羅門引

春光無主歡情愁事總難論
儘教心緒懨懨拚作一生

胡蝶隨意趁花顛便紅羞翠澀消受香沾
魂銷黯然
但聽去只啼鶻榆莢園中飛盡溪上荷圓
安排怎地待
問天天也悶無言知甚處結與因緣

別銀燈

幾點燈兒半掩一桁簾兒低捲鉤月纖纖
銀河渺渺秋
到今宵尙淺星期繾綣儘分做人間歡怨
瓜果誰家
筵宴底事清吟小院羅扇猶攜畫屏無睡
已是漏聲三
轉碧空涼宵問此後相思怎遣

春光好

心情那似當時最無奈
愁生鬢絲細雨簾櫳微病酒涼

上單衣 別來怎不相思漫忘了香衾夢依欲寫迴文
親寄與又恐羞伊

漢宮春

賦綠牡丹

翡翠簾櫳卻煙生暖日掩映花光名葩細翻舊譜魏紫
姚黃新苞乍坼襯琉璃葉護奇芳春荏苒看朱成碧花
花葉葉相當 比似那人亭北正雙蛾掃黛試倚仙粧
韶華可憐逝水漫羨紅香相逢慘綠笑郎君鸚鵡才狂
書寄與朝雲詩句露痕月色猶涼

虞美人

題秋江送別圖

一繩新雁秋初冷天淨雲無影片帆輕趁晚風開為語
青山載月渡江來 相思一日三秋遠怎不離情眷洲
邊已厭荻花多添說白門柳色奈愁何

醜奴兒

題新羅山人畫

芭蕉窗外三更雨葉葉涼聲挑盡銀燈夢斷天涯睡不
成 經年春思多蕭瑟種種難禁何事干卿寫得相思
者樣深

念奴嬌

題金焦放棹圖

挂帆風穩想此際放眼江天空闊兩點金焦相對峙好
向中流擊汰煙隱南徐雲橫北固倏忽殊明滅舉杯高
唱海門飛上孤月 如此一片蒼茫無端憑弔益覺豪
情發名士英雄今可在千古濤聲嗚咽誰倚高峰掉頭
天外鐵笛吹將裂試看鷗鷺偶來沙上眠歇

揚州慢

題太守李月汀邗江話別圖

去後猶思別時難遣謳歌早遍江城望征帆樹杪忽催
勤行程愛三月春風惠我朱轡到處一片歡聲悵津亭

帳飲夕陽無限消停 青山舊識幸重來竹馬爭迎怎
東閣聯吟驪歌再唱尊酒頻傾千古平山欄檻晴空外
聊寄遐音念醉翁楊柳低回今後離情

庚子

愁倚欄令

關心時近殘春早窗外風聲雨聲好處匆匆餘舊恨又
促愁生 可堪幾箇黃昏這淒切如何再禁從此芳菲
飄泊盡記取孤檠

辛丑

更漏子

碧梧風銀漢外搖漾月光如水秋悄悄夜遲遲窗痕帶
漏移 一桁湘簾放何似闌干凝望愁不寐獨沈思吟
成索和伊

侍香金童

題吳老蓮種梅圖圖爲張老薑作老薑裝池之廣徵
題詠興之所至今昔何殊卽以此爲爲老蓮寫照亦
無不可

月色當時舊是攜鋤處好一片春光交付與枝上雙雙
啼翠羽尋到羅浮夢魂如許 問畫中竹籬茅舍原無
主甚零落寒香幾度窗外更栽三百樹修到今生吟情

添助

水調歌頭

拈長鑱白木柄爲起句題冷紅主人攜樵圖

長鑱白木柄劇遍嶺頭雲聽過了了春木落葉又秋林
願得樵風一徑能否朝南暮北隨意送還迎箕踞顧人
世疇不歎勞薪 弄扁舟江上去作漁人又恐風波無
定何似入山深我乍相逢握手正是綺懷年少努力愛
青春圖畫且相約終踐故山盟

春光好

愁對酒怕聞歌一春過知否這時情緒瘦雙蛾 刻鳳

匣藏明鏡繡鴛裙掩香羅楊柳別離花薄命待如何
水調歌頭

題抱琴圖

對此忽增感慷慨欲陳辭中郎贈我焦尾寶貴世間稀
古調高山流水珍重一彈再鼓獨立世俱遺何必刺船
去海上始情移 昭文意淵明趣若相期芒鞋布鞵錦
囊三尺手親攜幾度綠陰眠處爲想聲沈音歇別是賞
心時聽者未可得奚事七絃揮

壬寅

眼兒媚

新羅山人畫題云个中有佳人妙如林上月獨背丁
香花低頭整羅襪衍其意爲詞

春風吹恨繞花枝開過海棠時金釵欲溜羅衣未整
地尋思 非關清露溼莓苔步履故徘徊闌干行遍更
無人見月影空階

甲辰

水調歌頭

甲辰中秋晝雨夜月欣感無似倚聲而爲此詞

把酒對佳節聊適坐書楹無端竟日風雨黯淡滯秋陰
不識天公何意捧出一輪明月幽趣發初更玉宇淨如

洗點綴絕微雲 綺窗開簾影動照孤吟幾番歡笑悲
感歷歷憶平生料想嫦娥天上未解人間情事獨自閱
虧盈共說今宵好試問若爲情

乙巳

暗香

題卞四幼竹孤山訪隱圖

湖山澄碧有素英萬點春風今昔一片遙情自覺寒香
動吟魄憶自逋仙去後儘開落幾番岑寂算未改疎影
黃昏明月舊時色 攜策眷尋覓試喚鶴夢醒與問幽
迹枝橫帽側數遍梅花定相識何處翛然步履想只隔

煙蒼雲白且待買數間屋結鄰澗北

眞珠簾

自題大兒建和所畫芙蓉便面

娟娟秋色新如許甚無端寫到秋深情緒清影照徘徊
似凌波微步一樣爭妍顏色好那用著東風爲主無語
自獨抱幽心漫憐遲暮 誰去采采江頭有遙情欲贈
幾回沿沂蘭澤况多芳儘露淒霜楚初日吟詩誇謝艷
算翦綠裁紅輪與領取愛明鏡風流箇人眉嫵

臨江仙

壁間懸陶立亭桃花玉蘭畫燈子時有所感各爲一

詞題之賞音寥寥莫能共喻倘有喻者其必將纏綿
悱惻於吾詞乎

桃花

正好韶光初媚低回笑倚簾櫳可憐人面比花紅春風
無奈吹艷易成空 爭似看來畫裏崔徽不減姿容漫
須胡蝶趁香叢枝頭清露情悽一般同

遍地花

玉蘭

綠淨園林麴塵歇放晴光皎如玉潔卻看他瀟灑臨風
正好是新姿秀發 任花繁艷繞香圍謝鉛華風情迥

絕漫相誇瓊樹朝朝只合擬少年時節

摸魚兒

乙巳中秋

甚陰晴日來無定教人游興全嬾霏霏一霎晴邊雨一
霎雨餘晴現秋正半算看月今宵天下團圓願濃遮密
掩想雲意瀾漫不如羅薄猶有素輝見 情多眷偏是
良時易失閒懷聊付杯盞名橋念四依然在早已玉簫
悽斷秋滿眼那堪更香彫艷落西風慘空庭夜暗只蟲
語階前雁聲天外似與助愁歎
月上海棠

重陽對月

茱萸未有東籬信
向黃昏把酒對清景
捲著湘簾漾澄輝
半輪冰鏡還堪耐
徙倚中庭漏永
晴雲暖意爭霜冷
便都忘風雨做淒緊
月愛秋明過
今月更無秋影閒
懷付試與孤鴻記省

十二時

雪月夜窗引杯獨酌
觸緒茫然莫能自遣
憶前日途中遇宣梅卿
握手論心歛歔
今昔率成此解寄之

訝今年幾番濃雪寒
得冬嚴如此正兩月
書齋窗閉但覺冰痕裂
紙燭炮還燒鑪温
重撥漸聽更聲起
卻此際

無限沈吟沒捉摸
處祇合曹騰尋醉
憶十年天涯咫尺
握手話言難已
浪泊萍飄雲翻雨覆
感慨悲人事悔
歲華易去匆匆
又將暮矣
蕩月光檐牙生白
一片虛樵如水瘦影
移來橫枝相對
似寫人憔悴
算念伊寄與無端
根觸誰寄

丙午

應天長

補研居士畫紫羅帳底人
猶睡簾幙春寒叫畫眉
詩意予更衍其畫意爲詞

兼寒帶暖吹花氣
枝上啼春禽語碎
繡屏深人未起卻

卻聽來殘夢裏 夢驚回縈恨思蹙損黛蛾雙翠一自
掃眉人去鏡痕羞再對

花心動

齋前杏花一株忽已六見其開謝矣

春色牆頭憶年時看花幾回躊佇舊捲畫簾纔見開時
又早落英飄樹卻憐紅意爭晴鬧怎今歲但經風雨剩
吹做疎陰一片奈何情緒 恨事懽驚易去向橫笛聲
中者番重訴試更自今記取芳消料得再開如故替花
愛好花能解應笑我鬢添霜縷只年少心情問花減否
丁未

虞美人

詠胡蝶題扇

慣矜心性驕羅綺春色相隨無際試想暖紅寒翠做那
般情思 翩翩粉帔沾香膩但是飛時成對消受一生
花底風露經曾幾

水調歌頭

題陳郁齋左右修竹小照

涼風滌煩慮把酒欲呼君與君俯仰今古何事不煙雲
容得科頭箕踞相對數竿修竹心境一時清試問在塵
網此樂幾人尋 俱休矣看雙鬢早星星結交回憶年

少意氣那能平自是胸中冰雪不受一些塵俗瀟灑契
幽清我復愛松石開徑請為鄰

戊申

探芳信

戊申正月十六暮雨滂沱張大春巒周二仲芷招同
謀飲伎館雖取樂不殊而浙瀝淒其以視昨日元宵
月色皎潔其風景之相去遠矣而乃閉戶寡懽各耽
其寂於以歎光陰之不可失有如此者予老已悔少
壯之不如人能毋感慨係之

對杯酒卻多少低回尋思前後算一般歌管歡笑宴紅

袖月明昨夜航孤賞未覺良宵負怎無端雲意沈沈風
馳雨驟 佳景豈長有信一刻千金那堪回首老去心
情未減已非舊憐伊眉翠銷何礙漫遣愁痕皺數芳期
纔是燒燈節候

菩薩蠻

仿温助教庭筠體

分明匳鏡參差挂當初自悔修蛾畫回憶斷腸時斷腸
知為誰 縣蠻何意緒榆莢顛狂舞春色耐芬芳春長
夢不長

水調歌頭

高樹日將暮星月又昏黃押簾那用銀蒜竹翠任輕颺
如此春光明媚如此春寒淒惻何處著商量只合一杯
酒獨立詠蒼茫 柳眉低桃臉薄最堪傷趁晴自有鶯
燕掠翦復鳴簧要得東君爲主畱意十分醞釀好與護
芬芳有淚未能灑共笑酒人狂

瑤花

自題朱石齋畫美人對鏡

名門窈窕宜面粧成自天然娟好新添眉譜曾未解十
樣黛痕親掃雲窗靜掩又怎得春風吹到問近來憔悴
何如待把鏡兒相照 便教憔悴相憐只瘦影依回心

事難告芳期試數禁幾度桃柳翠顰紅笑番風漸盡是
誰如韶光催了好畱將一片匳冰儘任網封塵罩

巫山一段雲

寒退春將盡花開月已殘風聲颯颯雨潺潺終日扣窗
鐶 背著燈兒坐尋思總是難荒唐神女在巫山枕上
夢魂單

一枝春

戲詠鶯粟花

纖采輕英記年時芍藥欄邊曾見芳游興阻况又小園
春淺羅衣瘦損問誰種月明庭院應已恨翠減紅消漫

想數枝嬌艷 尋思幾多淒惋甚炎風瘴雨無端零亂
鮮疑綵簇怎做異香吹散煙蕪一徑更無奈有人腸斷
須好是深屬東風緊拘慢管

御街行

見雨中墜蝶

飛來閒趁風搖曳正密雨如絲細那堪煙影十分沈更
新暑吹成秋意枝零葉亂香黏粉膩看幾度飛還墜
翩翩自作尋芳計只分別陰晴際可憐飄泊任沾泥卻
不向屏風貼死便教耐過霜摧草萎又誰喚香魂起

七娘子

題張傳山畫芍藥

花枝百種開春艷競春先不問春零亂畱伴殘期紅嬌
紫萼多情特與離愁遣 繁華歌吹休悲感憶花田已
變桑麻苑畫裏風流吟邊淒惋年年芳意韶光緒

阮郎歸

落花

是誰翦刻做春叢由來香艷空幾絲絲雨幾番風飄殘
幾片紅 塵夢外絮愁中間房閉綺櫳開時緩緩謝匆
匆歌聲聽惱儂

集賢賓

和通子詩後和 卷二
八月二十七日秦玉笙招集五笥仙館賞桂爲填詞
之會分得此調

到門花氣涼飈引吹拂幽襟萬軸藏書舊館階綠簾青
卻愛小山叢處幾枝密綻黃金曲廊無限畱人意招攜
共約聯吟寫向雲飄露溼香與韻俱清 念君少小便
相親鬢髮已星星且鬪尊前興致漫欲酸辛商酌秋光
濃淡徘徊秋意芳馨憶當日竹西歌詠消沈後猶自知
名畱貯天香十斛早晚塞霜新

青門引

符南樵以青溪贈柳圖索題於時秋窗雨冷午醉曹

騰舊恨新愁鬱爲此解倚聲青門引所謂短歌微吟
不能長也

不分閒情緒吹做天涯飛絮長條攀折已無多銷魂眞
箇總是飄零苦 一枝贈別簾前語簾外秋將暮可堪
耐過秋去青青再挽春風住

金縷曲

滴漏聲

情與秋俱寂滿空庭霜痕月影悄無塵息早見玉盤銀
漢轉更聽銅壺點滴怎淒入愁心如泣刻畫蓮花添漏
水到宵深別自成幽抑停復起已三商 箏瑟聒耳前

和遠子言後和 卷二
歡密怕報說更殘竹箭幾回寒澀紙帳剩教圍夢冷
觸吟魂醉魄又雨響吹來檐隙那爲不眠人意黯其城
笳巷柝如相覓驚歲序等閒擲
摸魚兒

帳影

掩紋羅夜深縫碧流蘇懸斷雲景燒殘絳蠟休重翦曾
照繡鴛交頸情漸冷只滿幅橫斜欲喚梅花醒房櫳寂
靜正涼月移來微風吹過淺畫墨痕映 帷犀鎮傍著
銀屏左近閒宵添倍清迴麝薰不放雙煙散畱伴枕函
寒嫩新恨引記展下輕衾光泛芙蓉錦遲回問夜看綺

袖低拳玉釵斜溜扶夢宵幽影

金縷曲

九月十三日淮海詞社第二集玉笙拈得刺繡聲坐
客咸以爲難爰依限調賦之得毋忍俊不禁乎

觸聽繁愁織憶妝成晝長閒坐唾絨香溼潛立分明窗
影下彷彿輕拋翦尺更皓腕金釵遲澀欲貌鴛鴦羞并
看愛迴文錦字春風碧情一縷悄吹出 鍼穿乞巧曾
秋夕笑拈來吟邊試手袖羅芳襲惆悵機絲虛夜月彈
入琵琶裂帛誤幾度鈿箏絃拂花樣重翻尋舊迹剩殘
縑斷綫音塵寂空寄恨繡奩側

青玉案

符南樵紅蕉閣填詞圖

銀箋只寫相思寄儘打疊心中事幾度低徊吟未是斟
紅酌綠偷聲減字消得瓊簫倚蕉心漫卷秋心碎卻
逗著春情膩霧閣雲窗空記憶鶯畱殘夢花飄閒思欲
遣還重理

惜黃花慢

戊申冬十月九日同何梅屋符南樵芮宜庵飲秋香
閣於時上弦月早菊始黃華天氣不寒頗似重陽風
景王子曰是會也可謂之爲展九月九日三君欣然

因相約共填此調

寂寞吟懷借翠簫象管遣醉歌臺錦燈初上綺窗半掩
涼風暗送明月斜窺計辰早已重陽過怎黃菊畱伴梅
開向此時較量好景前度清佳誰憐杜牧狂才任遍
題姓字盡識蛾眉鬢絲今日衣塵舊恨多番繾綣無限
遲回愛春併入悲秋意奈腸斷猶繫相思問酒杯肯教
去境重來

鼓笛令

送秋

送春只恐秋顛顛頓問秋歸又何情思挑盡殘燈聞雁喚

剩今夜夜長難寐 幾度冷吟閒醉算淒涼儘堪尋味
落葉無多吹恨起早催換霜心雲意

越江吟

蘋花

橫牽翠帶縈波鏡漠漠搖香點點西風影蘆灘涼近吹
無定 憶楚天千里清迥送秋盡相思漫與只合鷗情
冷寒煙做暝消芳訊

鎖窗寒

小雪日集金雪舫紅雪吟館

砌短侵苔檐低掃竹夕陽催暝窗遮繡綺絳蠟四圍深

映正初冬天寒漸嚴小春暖逗枝南信甚幾番雨意十
分風色數重雲影 分韻聯朋俊想碾玉調冰記將時
景擬尋鶴語早覺吟懷清迥看揮毫香吐筆花豪情共
惜良夜永笑人間多少浮名未若銜杯飲

玲瓏玉

釵梁

黏翠纍金巧裝點的的珠圓窺來端正漫疑雅製瑤冠
記得一雙玉燕認香雕文杏飛近花鈿旁邊稱堆鴉雲
樣鬢偏 那日風流笑語愛醉痕深淺紅上春嬌菱鑑
燈屏照翹枝面面增妍無何鸞分鳳擘似惆悵銀河渡

影只是愁添且珍重貼同心收向鏡奩

揚州慢

平山堂

低接平蕪遠浮空翠昔人曾此憑欄隔江波似練有數
點青山想無限名園勝概事殊情往都付荒煙怎閒拈
吟管春風楊柳年年 偶來憑眺認當時堂檻依然甚
杜牧清狂鮑昭豪盪賦稿詩篇轉眼滄桑今古成追憶
餘韻畱連問風流文采千秋誰嗣公賢

漢宮春

趙飛燕裙

翩若鸞迴愛仙持掌上錦裂鴛紋曾解練襦待夜繡煖
香溫佳人難得冠六宮象服承恩誰只說輕盈舞態內
家裝束生新 不少天姿艷飾有獵車衣影復殿簪聲
湘波欲裁半幅爲浣羞痕爭憐心性笑霓裳一曲親翻
休自憾任吹多少一般羅襪消沈

己酉

金菊對芙蓉

題阮梅叔珠湖漁隱圖

柳岸迷煙蘆灘湧雪風光占斷人間看忘情鷺冷避俗
鷗閒波涵明月非塵境笑武陵空記仙源平生此意自

和通二言後集 卷二
堪千古詩卷漁竿 未是寂寞湖干有夢中春草添寫
吟牋更歸來綠野同醉華顛棹船畢竟風波險問何如
西塞山前數間茅屋幾叢煙舍一帶雲灣

西子妝

仲春二月孔宥函招同放舟湖上坐客十人各有所
賦予成此解釋蓮溪爲作虹橋春泛圖

雲漾芳懷煙融綺思可奈湖山如許畫樓十里盡笙歌
是當年竹西佳處繁華漫語只流水碧於前度盪琉璃
愛乍晴波上輕舟容與 春風路跨水紅欄掩映垂楊
樹衣香人影最銷魂恨匆匆冶游虛負鶯新燕故算禁

得幾多情緒儘低徊一片韶光剩取

玉燭新

古花朝意園燈宴爲展慶元宵之會玉笙以詞見示

并索倚聲

輕煙融淑氣正寒褪芳辰暖新花事一輪此際光輝滿
欲買千金何似眠龍照綺問可勝鬧蛾情致剛好是桃
杏含葩爭誇十分佳麗 坐中客盡知名羨刻燭聯吟
引觴邀醉錦團繡綴風華映倩與平分春喜歌雲影裏
動一片香塵吹起惟願取花月精神瓊筵歲歲

錦堂春

古花朝後二日臥雲舫小集詠月

花事春風小院酒懷香霧迴廊碧空澹澹金波上一抹
界銀牆 前夕空憐三五昨宵微厭昏黃試看今後蟾
蜍影能得似芬芳

揚州慢

句生弟自以二十數年前元宵坐雨詞錄稿見示弟
素不作詞偶一為之而詞意委婉動盪居然作手已
西仲冬月當頭夜月色絕佳愛不能寐取其詞讀之
往復再三率成此解兼以申酬答之意云爾

街鼓聲稀夜沈於水一輪滿月中庭任霜袍寒擁自徙

倚虛楹想身世憑教偃蹇舉杯欲問空負豪情看冰壺

天樣晶瑩吹淨纖塵 一年試數算良宵今後重論憶

桂魄秋遲相期燈節開歲春迎二十數年回首淒涼甚

聽雨孤吟眷池塘夢影欹欹圓缺陰晴

附元宵坐雨揚州慢 響澀銅壺寒侵火樹驟來雨陣
如麻甚良宵三五漫麗景繁華想人自看燈深院檐
聲聽斷欲喜還嗟向虛空凝望沈沈雲影重遮一
年好月筭團圓初隔天涯更綠酒遲斟翠簫罷弄靜
掩窗紗欲向紫姑低下心中事說也都差任曹騰醉
去相思又到梅花

玲瓏玉

十一月二十六日王鶴汀招集同人為消寒第二會
擬作雪意詞爐酒乍溫階霰先集歸途則地白矣漏

下三商挑燈成此

葭管灰飛計時正九數三巡陰晴暮色幾番望眼同雲
莫是豪情催動要東風頃刻吹下瓊英無聲隔窗紗寒
點暗侵 漸聽街頭漏靜踏歸來雙屐輕垢冰紋密灑
虛飄料天公玉戲初呈添與酒懷詩興更三白年豐瑞
兆人意俱忻且高臥學袁安深巷閉門

一叢花

梅信限用東坡韻

嶺梅開謝已經年芳思有餘妍冬殘暗逗春消息早東
風吹到吟邊寄語翠禽何時枝上好夢卻重圓 風光

可是舊湖山疎影尚橫烟冰霜境冷無人問料爭紅自
占花先遙憶故人窗前疑是幽興破清眠

秋蓮子詞後稿卷二終

跋

吾人詩文有由選本得者有由全集得者由選本得者
塗逕窄而詞句淨由全集得者詞句雜而塗逕寬倚聲
之道如是也西御於詞今古名集枕藉殆遍故所詣至
此此事以毗陵爲藪澤然皆得自選本惟西御得於全
集毗陵派外必有竹西派出而西御執其牛耳然西御
亦善自選從善改不善此中擇執之力固亦堅矣至其
清雄絕俗超妙入神子瞻之稱漫任也吾無以易之道
光丙午七月倦翁讀而記之

寄意悱惻寓言宛折曲而有直體風騷之遺旨也丙子

和道子詩跋
閏月同寓蓮花寺汪正鑿讀并識

了無爾我自全其天此西御之性情也樂而應節悲亦
有時此西御之發爲詞章也然窮而後工心亦良苦此
西御之以秋蓮子自譬也汪奐之拜識於燕臺蓮花寺
西廂

南唐北宋妙諦分明西御得之深已故內無艱深之意
外無虛飾之辭春谷之所謂是者成者不在字句之間
索解也若第於南北諸賢尋消問息雖刻意求工詎能
臻此妙境耶壬辰二月二十三日翦燭再讀一過并識
服膺冬巢又書

栗密要眇精能之至語其思力則梅溪之織綃泉底也
喻其標格則石帚之野雲孤飛也小令寄託遙深一聲
一咽上者鍾隱次亦金荃會作者詞心而有以尋作者
詞遇矣辛卯四月旣望從慎伯丈處借此帙讀數過謬
綴數言以志傾倒元和蔣志冰淡懷甫

以逆爲順因生得熟西御絕世聰明成此妙詣小令直
逼南唐尤不可及欲作題辭爲之閣筆予廢斯藝矣丁
十二月弟澄拜讀一過戊正月重讀一過莫盡其妙也
昌黎有言歡愉之言難工愁苦之音易好故篇什之傳
於後者大抵愁苦之辭爲多吾友王君西御少嗜吟詠

壯而彌工而境遇之困亦與學俱進意其形於翰墨者
激昂慷慨不能自已乃讀其集假物言情愁苦之思往
往以歡愉出之溫柔和平使讀者悲喜交集不能自持
西御所居不蔽風雨而篤學不倦聲常出於戶外處貧
而不爲貧累其詩詞亦如之洵乎言之爲心聲也道光
丙戌八月望後弟包慎言敬識

宋人無小令元人無詩餘此卷合唐五代南北兩宋之
菁華而以典雅出之所謂上不入詩下不入曲者其庶
幾乎謹錄副數首以誌傾仰道光丁未三月幾望桐城
姚東之識

慎伯先生云意內而言外吾師周介存先生云意不好
換筆筆不好換意又云非寄託不入專寄託不出此兩
先生者可謂得詞之奧者矣南北宋諸名家傳之千古
而不祧者均不外乎此頃雜誦尊著與兩先生之說無
不合而可凌駕全宋也其情之纏綿淒艷又非學之所
能至還請質諸閣下或以鄙言稍有許耶時丙午重九
後二日讀竟識此并謹錄十餘解入所輯春田紅豆詞
叢江都符葆森

題辭

文辭何者爲難曰是爲難識者觀之以爲是則得已無可言喻也西御之詞是矣西御之詞成矣因係以詩涉筆誰知小技難較量毫黍亦登壇清吟卻與朱絃會莫作邯鄲一例看江都黃承吉

西御自編詩詞爲一集屬予爲之辭率成短歌奉政吾聞策千里之馬不如乘下澤之車操軒轅之琴不如吹齊王之竽宋人寶礫梧臺側卞和泣玉荆山隅與世浮沈混美惡丈夫未必非良圖君有奇才八斗儲珠璣錯錯青珊瑚胡爲落拓甘窮途人或笑其狂而我惜其愚

卽令摛錦布繡炫心而快意曾與吾身何補於錙銖讀
君之集三歎吁東西南北各有適吾徒跼踏將焉如道
光六年立夏日愚弟梅植題

靈犀一點許通神獨蛹孤抽妙緒成解道春濃秋瘦意
王郎方是善言情胎息堯章與易安此中辛苦解人難
好將一管珊瑚筆莫漫牢愁代淚彈昨日熙載歸攜尊
作見示循誦再三譬之牙曠言音窮微極奧心知其妙
而口不能言謹依原韻率和二章西御倘辱教幸甚時
漏下三鼓蟲吟在莎夜涼如水植之燒燭書呈

一寸靈心一縷絲絲絲總是斷腸辭辭成寫上朱絲絹
寄語春風知不知含愁含恨古今同底事詞人賦物工
春月秋花無限意寫來端合碧紗籠譜出瑤華字字仙
風流小令接唐賢先生妙論還成贊消息真從樂府傳
戊寅己卯間見西御詞往復吟繹驚爲曠代逸才今十
載矣西御錄其稿爲前後集持以示予雨夕風晨展誦
再四心乎愛之莫可言喻姜張而後數百年乃得一眞
替人也道光己丑春談怡曾拜題

一生多少閒情性耽吟轉添惆悵笛擲金尊箏調玉柱
贏得淺斟低唱孤桐自賞伴鶴唳霜空白雲來往指點
風流馬塍十里看花放前塵幾經夢想竹西游冶處歌

吹重訪繪月無聲臨風有影卻是箇中清况高歌試望
笑此度相逢便宜天壤褪盡豪尖因君還技癢調齊天
樂西御仁兄先生以所著秋蓮子詞集見示譜此爲贈
道光丙戌冬月冬巢弟汪潮生讀後題識

江草日日喚愁生湖月林風相與清爲人性癖耽佳句
學語小兒知姓名門泊東吳萬里船春渚落日夢相牽
幾回細寫愁仍破橫笛短簫悲遠天雀啄江頭楊柳花
應須美酒送生涯孰知二謝能將事弟勸兄酬何怨嗟
錦城絲管日紛紛中間作者寂不聞更覺良工心獨苦
傳聲一注溼青雲集杜四絕句奉題西御仁兄秋蓮子

詞卽乞裁正曲阜愚弟宥函孔繼鏢

草堂舊夢一聲聲喚醒花間殘笛宛轉尋春春不見吹
起一池寒碧愁已如絲情還似水疏雨梧桐滴小紅何
處冷香飛上詞筆剩有薊北江南蒼涼雲樹處處思佳
客說與霜空新過雁莫問沙邊陳迹扇底歌塵橋頭明
月寂寞傷今昔不堪回首酒痕襟上狼藉調壺中天井
南老人鶴汀王壽拜題



